

# XOTA

## Xota Iokanatsopatakiti

<sup>1</sup> Nota Xota. Xesosi Kristo nitiri amotakori nitxaua. Txiako itari nitxaua. Niokanatsopata kãkitimoni, Teoso akiritakinimoni, Teoso aïri tire-takinimoni. Xesosi Kristo nïkatakiniimoni niokanatsopata.

<sup>2</sup> Teoso iteene amonïkai. Itene ikamaerekaxiniretai. Itene itiretai.

### *Atão Minakati Oerekakani*

<sup>3</sup> Hïte nota tiretakini, Xesosi makatzakapekari himaerekani, nota maerekani apaka. Ninirekamari niõkatsopatiniri amaerekani makatzakiko pirena hïtemoni. Iuanoka ninireka niõkatsopatini, txamari nixinikari erekape ãtião niõkatsopatini. Ninirekari nõtãkikinii. Teoso oerekakiti sãkiretxiti inakitiakorimoni isikakiti hinïkaenetariko. Teoso oerekakiti ikinika isikapekari inakitiakorimoni. !

Hãuiritapiri apanakini koketiniri ikara ninoa oereëkitikata. <sup>4</sup> Hïte Xesosi sãkire auiãkani sauaki aua Teoso mapaxitakani. Merepanika ninoa apotiitakasaakiua hïtekata, ! himarotari kamisirienererini ininiuana. Ninoa koketari isãkirena Teoso sãkirekata. Ninoa sãkire: “Ate sirïka anireëkitokata, kotxi Teoso katiraõkiri, ininiã iua !imisiritaua.” Ikara atokora itxana ninoa. Xesosi Kristonokara aãuïte. Apiananiri itxaua. Iuaritika ninoa !nirekari Xesosi. Kitxakapirïka Teoso sãkire iõkatsopatakori sãpiretari Teoso misiritiniri kãkiti ninoa atoko inakani.

<sup>5</sup> Kitxakapirīka Exito tixini auakani misiritana Xoteoakori. Himarotapekari ikara inakari. Ninirekari iuaīkana hīxinikiniri ikara inakari pirena. Teoso moianatana Xoteoakori, ininiā ninoa miteka, Exito tixini osipikinina ĩkapani. Hīxinikariko ia: Teoso makatxakana ninoa iusaaki imapinakanina ĩkapani, iuaritika mapa kasiriti napa atoko Teoso okana ninoa iua sākire mauīākani.

<sup>6</sup> Ātipekana nisāpiretai. Hīxinikariko Teoso nitiriakori iaxitikini kitxakapirīka. Teoso txīkitakana ninoa auītetxi ininiuana, txamari !inirekaikarina Teoso paniātakiti ikaminina, ininiā itakanaparina auuniātaāna Teoso tixineē. Hīxinikariko ia: Teoso paniātana ninoa ipiaā ikaikotinina ātipirika. Itixi xipokini ōtisaaki Teoso misiritanako ninoa.

<sup>7</sup> Ātipekana nisāpiretai. Hīxinikariko Sotoma sitatxiti, Komoha sitatxiti, apanakini sitatxiti apaka iuaātaā takote auakari. Iuaā auakani !inirekari Teoso paniātakiti ikaminina, ninoa Teoso nitiriakori atokokana. Maerekatnoka inirekapikana, kiki sirīkini āti kikikata. Ininiā Teoso xipokari iuaā auakari sitatxiniri. Ninoa maerekani xika Teoso iokanatana ninoa arikatxi maxipokatimoni. Iuaā imisiritaākapikana. Ikara ōtākikaua maerekati amakamakani tīkane.

<sup>8</sup> Ninoa maerekati kamakani, kamisirienererini hīte sauaki auakani, kitxakapirīkarini atokokana itxana. Ixiniākitina maerekati xika ninoaka ĩto imisiritauana. !Inirekarina Teoso ninoa auīte ininiuana. Imisākirepiretarina Teoso nitiriakori iaxiti auakani. <sup>9</sup> Mikeo inakori Teoso nitiriakori auīte itxaua, iuaritika ! imisākirepiretari āti Teoso nitiri iaxitikiri. Kitxakapirīka iua Mikeo

Satanasikata itaparakienatakakaua, kotxi Mikeo nirekari Moisesini ïto ikatini, txamari Satanasasi nirekari Moisesini ïto iua inakiti ïkapani. Iuasaaki Mikeo !imisãkirepiretari Satanasasi. Ianoka isãkire: “Teoso misiritapanikaiko pite,” itxari Satanasasi. <sup>10</sup> Txamari ninoa kamisirienererini hïte sauaki auakani misãkirepiretari ikinika imimarotakinitina. Ninoa ïïkite kaxipiri ïtopa auakani ïïkite atokokana, kotxi ikamarina ïïtonani nireëkiti. Ikara ïïkitena xipokanako ninoa.

<sup>11</sup> Teoso misiritanako ninoa. Kitxakapirïka Kaiï inakori kamari maerekati. Iua maerekani atokokana ninoa maerekani. Kitxakapirïka Paraão inakori kamari maerekati txineiro apakapini ïkapani. Iua maerekani atokokana ninoa maerekani. Kitxakapirïka Koree inakori ! inirekari Moisesi iauïte ininiua. Iua atokokana ninoa ! inirekari Teoso iauïtetini. Ininiã ixipokaãkanako Koree xipokiko atokokana.

<sup>12</sup> Hãpotiitakasaakiua hinipokotini ïkapani, ninoa kamisirienererini apaka nipokota hïtekata. ! Ipëtauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. ïtima anikari katxiãri iaxitikiri, ininiã katxiãri napiniãtaã ãparaã kipa, takari aneini ïkapani. Txamari ninoa kamisirienererini katxiãri ãki ãparaã mauakiniti atoko itxa. !Erekana kãkiti ïkapani. Mitaãsaaki aua txipokori, txamari ninoa kamisirienererini mitaãsaaki aamina mariti atokokana ninoa. Aamina mariti ipïkari atoko, kotxi ! iminaua. Ninoa iua atokokana, kotxi ! ikamari erekari. Aamina mariti tokaãka. Ikotsa maporokaãka, ininiã atão ipïkari itxaua. Ninoa kamisirienererini ikara aamina atoko, kotxi

ipinanako. !Ikaikotana Teosokata ãtipirika.

<sup>13</sup> Potxoari uiniti tsakati pamonõkoniri atoko itxa ninoa kamisirienererini. Tsakati sori txiko atoko itxa ninoa maerekani. Iõriki atoko itxana. Iua iõriki sinimoni !kimarotikori. Ninoa sariko ipiãmoni ãtipirika ikaikotinina ãkapani. Teoso mereëri ikara ipiaãtaã ninoa auini ãkapani.

<sup>14</sup> Kitxakapirika Enoki inakori sãpiretapekari kamisirienererini pirena. Iua Enoki Adão apika mekaniri apika mekaniri itxaua. Enoki txari:

Hãtamariko. Apiananiri apokako itiximoni ito-  
maneri inakitiakorikata. Mio, apikomoni  
mio, apikomoni mio, itxaãpokata inakiti-  
akori iuakata ãkani.

<sup>15</sup> Iua ikinipoko misiritiko sãpiretakari itxaua. Iua apokasaaki, isãpiretanako maerekati kamakani misiritiko, Teoso manireëkani misiritiko, kotxi Teoso !ipotxitari ninoa kamakiti. Ninoa misãkirepiretapikari Teoso. Ninoa maerekani xika, Teoso imanirekakanina xika, imisiritaãkanako, itxa Enoki sãpiretakiti kitxakapirika.

<sup>16</sup> Ninoa kamisirienererini ãtipirika tsoatapika. ãtipirika apoõtapikana apanakini. Iõtona nireëkitinanira ikamana. Iuikauana. “Peerekai pite,” itxana ãtimoni inireëkitinani apakapinina ãkapani.

### *Õtãkipirenatxi*

<sup>17</sup> Nitiretakini hãxinikariko aãuõte Xesosi Kristo iokanatakini sãpiretakiti akokaxiti. <sup>18</sup> Ninoa txai: “Xipokatxi õti kaimapeka inini manapi apokanako kikiakori hõte napetakani tãkane. Ninoa kamariko ninoaka nireëkiti, Teoso

manireëkiniti,” itxana Xesosi Kristo iokanatakini sãpiretakiti. <sup>19</sup> Ninoa maerekani xika kãkiti txitakakaua. Ninoa kamisirienererini kamari iĩtona nireëkitinoka. Erekarı Matamatakoti ! auinana ninoa.

<sup>20</sup> Hĩtepekana nota tıretakini, iteene hãuikapıkarıko Teoso oereëkiti. Ikara atoko hininiã, kataparaxınireıko hĩte. Hãuıkarıko Teoso oereëkiti, kotxi Teoso sãkire itxaua. Himısãkiretarıko Teoso. Erekarı Matamatakoti oerekai atão hĩsãkirauatini ĩkapani. <sup>21</sup> Maerekati kamakanii, iuarıtıka aãuĩte Xesosi Kristo ! imısiritai. Iua anikai ãtıpirıka iuakata hãuini ĩkapani. Ikara hiãtapakasaaki, ãtıpirıka hĩxinıkapıkarıko Teoso tiraõki hĩte ĩkapani. !Hĩtakanapıri iua.

<sup>22</sup> Apanakini ! auıkapanıkarı ĩkinika Teoso oereëkiti, iuarıtıka !hĩtxıtapena. Hımoıanatanako ninoa iteene auıkiniri ĩkapani. <sup>23</sup> Pamonõkoniri, kãkiti kamakasaakiri maerekati. Xamina tırınakari atoko itxa imısiritıkona imaerekanına xika. Ininiã hĩsãpiretanako Teoso sãkire, imısiritıkona apokini apisapanıka. Xamina tırınakari ãki katxakakari pimakatxakini atokokana itxa, pisãpiretakasaakiri Teoso sãkire ninoamoni. Apanakınıpekana hıamonĩkako. Hıamonĩkasaakına, erepanıko, kotxi pamonõkoniri ninoa maerekani. Homanatarıko maerekati ninoa kamakiti, hĩte makamakaniri ĩkapani.

### *Peerekari Teoso*

<sup>24</sup> Teoso kaposotiireri nĩkataua maerekati amakamakani ĩkapani. Iua anıkaua iua apisatoõ apoxokonıritıka. Iuasaakıko amaerekani ! auaikako. Peerekari aãuini iua apisatoõ. <sup>25</sup> ãtı Teoso !auari. Iuanokara Teoso txaua. Iuanokara

kimaroreri. Amaerekani makatzakakari itxaua, kotxi aãuñte Xesosi Kristo ipina ate ñkapani. Iua iotximere aua, kotxi imaerekani ! auari. Auñtetxiakori auñte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. Ikara atoko itxapikako ãtipirika Teoso. Ameẽ.

**Teoso sãkire amaneri**  
**New Testament in Apurinã (BR:apu:Apurinã)**

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

**Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
253eaec7-f0c7-5b49-b6be-65ee5354d0ed